

# *SINTIMENTU*

## LA FATA MURGANA

Tu nun li sai, amuri, certi cosi;  
tu nun li sai, t'i dicu nta n'aricchia.  
Ti li cunfidu, si tratta d'un sigretu:  
m'arraccumannu, tenili pi tia.

Cu' ti talia la facci, l'occhi, 'a vucca,  
dici: 'un è bedda, ci ni sunnu tanti.  
Macàri iu, chi ti taliu nto spissu,  
pensu: 'un c'è nenti, nenti di spiciali.

Ma quannu poi chi ti vegnu o' ciancu  
e mi spicchìu dintra li to' occhi,  
e vasu leggiu leggiu la to' vucca  
e poi la vasu e la rivasu ancora...

allura 'st'occhi diventanu du' stiddi  
chi lucinu a tipu di smiraldi;  
li labbra: cosi duci di batia  
fatti di meli e frutta 'ncilippata.

La to' facci rinasci a vita nova  
comu lu sulì chi surgì la matina;  
ridinu l'occhi, la vuca, li capiddi,  
riluci 'a peddi, diventi un sfaiddiu.

Doppu però, quannu chi ti moddu, e,  
nun ti talìu nta l'occhi e nun ti vasu,  
sparisci la Murgana 'ncantatura,  
torni nurmali, comu tanti e tanti.

Ti dissi lu sigretu, amuri meu;  
ti dicu puru chi ni su' cuntentu:  
viditi bedda è datu sulu a mia,  
pi l'atri genti nun ci nesci nenti.

## NUN E' CANCIATU NENTI

Ancóra ccà davanti  
patri meu!  
Ancóra,  
doppu l'anni chi passáru!  
Puru si ciuri  
portu o' Cimiteru,  
sempri prisenti nta li me' pinsèri,  
sempri impunenti  
e c'u surrisu 'n vucca.  
Sbampa lu sulì  
quannu tu cumpari!

La to' pirsuna,  
la to' parola duci...  
'Na calamita!  
Nun è canciatu nenti.

## 'A NIPUTEDDA

Vinia di cursa  
cu li piduzzi nichì  
e mi satava 'n coddu  
e m'abbrazzava...  
Ora è chiù granni,  
un pocu cumpassata,  
sempri cuntenta  
di starimi vicinu.  
«Nunnuzzu meu,  
lu sai...»  
e mi racconta  
tanti cusuzzi  
di scola e di cumpagni.  
Lu nonnu ascuta  
(a nica va criscennu).  
Quarc'annu ancora  
e.....  
C'u' sapi, si ci semu?!

## LA CANI MURENTI E A PICCIRIDDA

Era murenti  
la cagnola.  
E cu la so' manuzza  
ci mannava saluti  
'a picciridda.  
E la chiamava pi nomu  
e ci ridia.  
E ntra lu mentri,  
lacrimi di duluri  
ci vagnavanu l'occhi  
e li masciddi.

## VINT'ANNI

Vint'anni su' passati!  
E pari aéri.  
M'accumpariù  
a tipu 'na visioni,  
nt'on campu  
di machini di cursa,  
'dda matina!  
E mi cugghiu  
l'occhi, la menti, lu cori  
e puru li pinsèri.  
Vint'anni! E pari aéri.  
Ora è ccà, cu mia:  
ad allitari 'a casa,  
a jnchiri di ciuri  
la me' vita.